

Yëkkuö kit Santiago tö

Santiago

Yëkkuö i' kit Santiago tö. Welepa tö ibikeitsè tö ie' dör Jesús èl eköl. Ie' bak senuk Jerusalén ena eë ie' bak Jesús mik erblökwakpa wökirie. Nies mik Jesús ttekölpa tsá ena Jesús mik erblökwakpa wökirpa malepa e'pa ñi dapaq' Jerusalén Pablo kanè pakoie, etá Santiago tso' iwökirie (Hechos 15 saú). Mateo 13.55,56 tö Jesús èlpa ena ikutapa e'pa chè.

Israel aleripa erblè' Jesús mik esepa taië bak senuk ká bánet kuá'kí kuá'kí a o'kapaie. E'pa a Santiago tö yëkkuö i' kit. Yëkkuö i' kit ie' tö kabene kuá'kí kuá'kí cheke erè e' yökí ie' tö iché: Mik se' serkeia ká i' kí etá se' weirdaë Jesús mik erblè kuëki, e' wa Skéköl tö se' kimeke senuk yësyèsè ie' a. E' kuëki kè se' kàne tkinukwá se' weirke e' wá. Se' ké ttsè'nuk buaë mik s'weirke etá. Es Santiago tö iché.

E' kíie tá ie' tö iché wës se' serke ena ì weke se' tö, e' wa iwënewá tö moki se' erblöke Jesús mik ö au. Wës se' tö s'malepa sueke e' dör ibua'ie. S'siarëpa kí Skéköl tkirke ena ie' wöá tá sulitane dör nies. E' kuëki kè se' kàne inuköl blúpa sauk bua'ie s'siarëpa tsata.

E' kíieta Santiago tö iché tö inuköl blúpa tö s'siarëpa watëttsa ena kè ipatuè buaë, esepa kí taië kabene tso' S'yé wöá, e' tö iwe'ikeraë s'siarëpa we'ikè e' núí kí.

Shké'wè

1 ¹Ye' dör Santiago. Ye' dör Skéköl ena Skékëpa Jesucristo, e'pa kanè méso eköl. Ye' tso' yëkkuö i' shtök a' dör Skéköl icha^a e'pa a. A' shké'wémíyö.

S'weirke kōs e' dalè'ttsòsö

²A ye' yamipa, mik ì sulu tköke a' tá tsákië a' ma'woie, etá a' ibikeitsó: “iAyëcha buaë ye' tá!” ³E' wà dör tö a' wá ijcher tö mik se' erblöke Skéköl mik e' ma'orke, etá e' tö se' kimeke e' tkökwá darërëë. ⁴E' kuëki a' e'

^a 1.1 a' dör Skéköl icha: Griegoie ttè i' dör: *ditséwö dabom eyök kí bōl bakyalmi ká wa'ñe.*

tkówa darërëe erblök Skëköl mik, kè ilo'yar as a' er kurwa buaë darërëe wes ie' kî ikiane es, kè ì kiarpaia a' kî ie' wöa.

⁵Erë a' welepa kè éna iane tö ì dör bua'ie wè, e' ta ikió Skëköl a ta ie' tö a' kîmeraë as a' éna iwà ar buaë. E' kiésó ie' a, e' kè tö ie' tsriwè. Ie' tö ì buaë meke sulitane a taië kè erta'wa ekkë. E' kueki ikió ie' a.

⁶Erë mik a' tö ilè kié ie' a, eta a' erbló darërëe ie' è mik, kè ibikeitsar bötböt. Yi ibikeitséka bötböt, ese dör wes dayè uyè siwa' tö wî a dià a es, kè merta'wa bèrè. ⁷⁻⁸Yi dör es, ese erbiköke bötböt kekraë, kè erbikò etkëme. E' kueki ese kè tö ibikeitsök tö Skëköl tö ì mèmi ie' a.

⁹S'yamipa siarëpa erblöke Jesús mik, esepa ttsè'nú buaë shute, Skëköl tö ie'pa tkéka pè' taië ie' a e' kueki. ¹⁰Es nies s'yamipa inuköl blúpa erblöke Jesús mik, esepa ttsè'nú buaë shute, Skëköl tö ie'pa wóewa diöshet e' kueki. Ie'pa ta itköraë wes ma'ma wörkua es. ¹¹Mik diwö deka ba'baë, eta e' tö ma'ma wörkua alabëwéwa anewa, kè wëria buaë wes kuaë es. E' suë itköraë inuköl blúpa ta, ie'pa íyi tso' taië, e' shua iblërdawarak.

¹²Wépa ma'orke e' dalè'ttsekerakitò er bua' wa, ayëcha buaë esepa. Ie'pa dettsa buaë, e' ta sene michoë merdaë ie'pa a iskéie. E' muk Skëköl kablè' wépa éna ie' dalër esepa kos a.

¹³Mik yi erkié ì sulu wamblök, e' ta kè ichar: “Skëköl tö ye' erkiöwé ì sulu wamblök.” Kè yi a Skëköl erkinuk ì sulu wamblök. Nies Skëköl kè tö yi erkiöwépa ì sulu wamblök. E' kueki kè yi kàne ichök: “Skëköl tö ye' erkiöwé ì sulu wamblök.” ¹⁴E' skéie, se' wák dër suluë, e' tö se' erkiöweke ì sulu wamblök ta sulu se' éna iwamblak. ¹⁵E' ukuöki ta iwawamblésö. E' ukuöki ta se' wöblanewatke ì sulu è wamblök, e' nuí kî s'duörawa.

¹⁶A yamipa dalër taië ye' éna, kè a' e' kî'tö'uk. ¹⁷Ì kos dör buaë yësyësé tso' se' wa, ese meke se' a S'yé tso' ká jai a, e' tö. Ì kos dalöburke ká jai a, e' yö' ie' tö. Íyi ekkë kos e' olo maneorta'ne, erë ie' kè e' mane'uta'ne. Ie' wák dër buaë yësyësé kekraë. ¹⁸Ie' wák er wa, ie' tö ibikeits se' er mane'uk pa'alí ie' ala'rie, se' tö ie' ttè moki klö'wé e' batamik. Ie' tö iwé es as se' dö íyi kos yö' ie' tö ese tsá bua'ie.

Skëköl ttè iütösö

¹⁹A yamipa dalër taië ye' éna, ye' ttò ttsó. Mik yile ttöke a' ta, eta ikukuebló bua'ie, kè iütar bet ena kè a' ulunukka bet. ²⁰Se' ulur e' kè tö se' kè senuk yësyësé Skëköl wörki. ²¹E' kueki e' ya'we kos ena ì sulu skà tso' taië, ese kos watóttsa uyóttsa a' tö seraa. E' skéie Skëköl ttè tso' se' er a, e' klö'ú, e' wà iütó bèrè er bua' wa. Ttè e' tkëule a' a wes íyi kuatkèsö es. Ttè e' a a' tsatkërmi.

²²Erë kè a' tö Skëköl ttè kïttsar kukuò è wa, iwà iütó mokië. A' kè tö iwé es, e' ta a' e' kî'tö'uke. ²³Yile tö Skëköl ttè ttsé kukuò è wa, erë kè itö iwà iütè, e' ta ese dör wes wëm e' saü wösuö wa es. ²⁴Ie' e' sué wösuö wa

ta imía, erë bet iéna ichowa tò ì suéitò iwö kî. Ta ííók ie' e' wö sué? ²⁵Erë yi er me'rie ttè dalöiëno yësyësë tso' s'yottsã ì sulu ulà a e' kî, ta e' a ie' tkökewã darërëë ena iwà iutekeitö buaë, kè ichõtã'wa iéna, ese a Skëköl er buaë chöraë ì kos wekeitö e' a.

²⁶Yi e' bikeitsò tò ie' dör Skëköl dalöiökwak mokië, erë kè ikkò kî ì sulu blërta'wã chè, e' ta ese e' kitö'uke siarë. Ie' e' bikeitsò tò ie' dör Skëköl dalöiökwak, erë e' dör kache, kè wã ta'. ²⁷Erë Skëköl dör S'yé, e' wöã wépa tò ie' dalöieke yësyësë, kè ì sulu ta', esepa tò jchu'rlapa ena alakölpã schópa weirke siarë, esepa kimeke. Nies ie'pa kè e' ia'uta'kã ì sulu tso' kã i' a ese wa.

Sulitane dalöiösö ñikkëë

2 ¹A yamipa, se' erblöke Skëkëpa Jesucristo olo ta' taië e' mik, esepa ké sulitane sauk ñikkëë. ²⁻³Iwã kkachekeyö a' a' i' es: ichòsò tò wëm inuköl blú debitü eköl wé a' ñi dapa'uke ee, paiëule buaë datsi' bua'buwa, ñies ula'tsio iéitö dalölöë. E' kiéwã a' tò weshkë ta' ishke'wé buaë ta' iché ia: “be' e' tkóser íe kula' buaë i' kî.” E' wöshã ta' s'siarë debitü eköl datsi' nula sulu dó è ta' a' tò ichè ie' a: “Be' e' duódur seë ö be' e' tkóser íski.” ⁴A' tò iwé es, e' ta' a' e' wamblö suluë. A' er suluë, e' kuekî a' kè tò s'dalöieta' ñikkëë.

⁵A yamipa dalër taië ye' éna, ye' ttò ttsó: wépa dör siarë kã i' a esepa shukitbak Skëköl tò as ie'pa dö erblë ie' mik e' blúie. Nies ie'pa shukitbakitö as idörak wépa blúie ie' tso' e' kfië wes ie' kablë' wépa éna ie' dalër esepa a es. ⁶Erë ie'pa dalösewëkwã a' tò. E' skéie inuköl blúpa suëke a' tò buaë dalöieke taië, erë esepa tò a' we'ikeke siarë. Ie'pa wã a' mi'ke kkatè s'shulökwakpa wörki. ⁷A' dör Jesucristo icha erë inuköl blúpa tò ie' cheke suluë. ¿Wes esepa dalöiëmi a' tò s'siarëpa tsata?

⁸Skëköl ttè dalöiëno bua'ie kitule iyëkkuö kî, e' tò ichè, “A' malepa dalëritsó wes a' wákpa e' dalër es.”^b Ttè e' wã iuté a' tò moki, e' ta' e' dör buaë. ⁹Erë a' kè tò sulitane suë ñikkëë, e' ta' a' tso' ì sulu wamblök. E' wa a' tso' ttè dalöiëno bua'ie e' dalöseukwã. ¹⁰Yi tò ttè dalöiëno e' dalöieke iekkë ta' seraa, erë e' et dalösewéwaitö, e' ta' e' dör wes ie' tò ttè kos dalösewéwã es. E' nuí kos ane ie' kî. ¹¹E' wã dör tò Skëköl tò iyë: “kè a' kawö ta' s'senewabak dalöseukwã,” ñies e' wák tò iyë: “kè a' kawö ta' s'ttökwã.” Kè se' wã s'senewabak dalöseonewã, erë s'ttewasö, etã e' wa se' ianewã ttè dalöiëno e' dalöseukwãwak. ¹²Ttè e' me'at Skëköl tò se' tsatkoie se' er sulu e' yöki. Ttè e' wa ie' tò s'shuleraë aishkuö ta'. E' kuekî a' ttó, a' senú wes ttè e' tò ichè es. ¹³Kè sö s'malepa suë er siarë wa, e' ta' mik se' shulirketke, etã Skëköl kè tò se' suëpa er siarë wa. Erë s'malepa suëkesö er siarë wa, e' ta' idörattsã buaë se' a' mik se' shulirketke etã.

^b 2.8 Levítico 19.18

Ì buaë wésö s'malepa a e' wa iwënewa tö mokì se' erblöke Skëköl mik

14A yamipa, yi e' chò: “ye' erblöke Skëköl mik”, erë ese kè tö ì buaë weku' s'malepa kimoie iwà kkachöie, e' ta' ie' e' chò es, e' kè dör ìie bua'. ¿Wes ie' tsatkërimi? 15E' wà kkachekeyö a' a' i' es: ichösö tö s'yami eköl, wëm ö alaköl, ese tso' siarë, datsi' kè ta', chkwö kè ta', 16eta' a' wele tö iché ie' a: “Be' shkó wöbla wa, Skëköl be' kimè. Be' e' paió buaë, be' chkó buaë.” A' tö iché ie' a es, erë ì kiane ie' ki e' kè mène a' wa ie' a, e' ta' e' wa ì buaë wé a' tö? 17Es ñies se' e' chò tö se' erblöke Skëköl mik, erë se' kè tö ì buaë weku' s'malepa a iwà kkachöie, e' ta' se' e' chò es, e' kè dör ìie bua'.

18A' wele tö ichëmi ye' a: “ye' tsatkërdaë ye' erblöke Skëköl mik e' è batamik.” A' wele skà tö ichëmi ye' a: “ye' tsatkërdaë ì buaë wekeyö e' è batamik.”

Ye' tö ie'pa iutëmi i' es: S'erblöke Skëköl mik ena ì buaë wekesö, e' mir ñita. Se' kè wa ì buaë one, e' ta' kè se' a iwà kkayënuik tö se' erblöke Skëköl mik. Erë se' tö ì buaë weke, e' ta' e' wa se' tso' iwà kkachök tö mokì se' erblöke Skëköl mik. 19Se' e' chò tö iklö'wésö tö Skëköl dör eköl ème, eta' e' dör buaë. Erë ñies aknamapa tö iklö'wé es, eta' e' tö ie'pa suawëkeka painuwekeka taië.

20Kè a' senuk wës kè se' er ta' es. A' éna iwà anú tö yi e' chò tö ierblöke Skëköl mik, erë kè itö ì buaë weku', e' ta' ie' chò es e' kè dör ìie bua'. 21Se' yé bak ká iaiäë kiè Abraham, e' tö ilà kiè Isaac, e' méka ka' yö'itö íyi moka Skëköl a e' ki ttëwa ña'wëwa wës Skëköl tö iuk patké' es. Mokì ie' mí e' wà uk erë Skëköl tö iwöklö'wé. Skëköl tö isué tö mokì ie' mí ittò wà iutök. E' kuëki ie' tö iklö'wé wës wëm yësyësë es. ¿E' kè jcher a' wa? 22Es a' éna iarimi tö mokì ie' erblé Skëköl mik. Ie' tö Skëköl ttò wà iuté, e' tö iwà kkaché tö mokì ie' erblé imik. 23Es ì tso' kitule Skëköl yëkkuö ki e' wà ane se' éna, e' tö iché: “Abraham erblé Skëköl mik, e' kuëki iklö'wéitö wës pé' buaë yësyësë es.” E' kuëki ie' kine Skëköl sini!. 24Es se' wa ijcher tö Skëköl tö se' klö'wé wës pé' buaë yësyësë es, ì buaë wekesö iwà kkachöie tö se' erblöke ie' mik ese batamik. E' kè dör tö se' erblöke ie' mik e' è batamik.

25Es ñies ibak ká iaiäë alaköl trër taië kiè Rahab, e' ta'. Josué tö wëpa patké Jericó weblök tö wës iulà dòmi iska!. Ká e' a e'pa kiéwa Rahab tö buaë ie' u a' itsatkoie. E' ukuökì ta' ie' tö ñala kuä'ki kkaché ie'pa a as e' wa itköshkardak. Es ie' tö iwà kkaché tö ie' erblé Skëköl mik. E' batamik Skëköl tö ie' klö'wé wës alaköl yësyësë es.

26Mik se' duowa, eta' se' wiköl mía ta' s'nu è atë. E' sù mik se' e' chò tö se' erblöke Skëköl mik, erë kè ì buaë weku'sö iwà kkachöie, e' ta' se' e' chò es, e' dör wës s'nu es, kè dör ìie bua'.

S'kkò paklòusò as kè sò ì sulu chò

3 ¹A yamipa, a' wà ijcher tò sa' wépa tso' a' wöbla'uk Skèköl ttè wa, esepa chakeraè aishkuò tã Skèköl tò taiè s'malepa kè dör s'wöbla'ukwakpa esepa tsata. E' kuekì kè a' e' yuökka s'wöbla'ukwakpaie taiè. ²Sulitane tò ì sulu wamblèta' taiè. Erè wé kè tò ì sulu cheta' yès, ese dör buaè yèsyèsè. Ie' a e' wöklörmi as kè itò ì sulu kos wamblò. ³Kabaio diché taiè, erè ikkò payuekewasò tsa'ukuöla wa tã iwèttèsèmìsò wès se' kì ikiane es. ⁴Ñies kanò blublüè shkòke dayè kì, ese bikeitsó. E'pa dör bërie, e' uyeke siwa' tò darèrèè, erè ñakoie e' dör tsirlala, e' wa ñnakökwak tò ñakeke buaè dò wé ie' kì ikiane tò imi' ee. ⁵Es s'kkò dör tsirlala, erè e' a ì taiè wamblèrmi wès bö'wò tsir tò tè taiè ña'wèwa es. ⁶S'kkò dör wès bö' es, e' dör ì sulu chók tso' se' a. Se' tso'ia' ttsè'ka, e' dalewa e' tò se' wák kos e' sulu'wekewã kekraè wès bö' s'ña'wè es. Bö' e' datse bö' kè a. ⁷Iyiwak ulitane urutèrmi se' a. Iyiwak kañiru kos, dù, tkabè, ñies ì tso' dayè a, e' kos urutöüle se' wã. ⁸E' skéie kè yi a ikkò paklönuk as kè itò ì sulu chò. S'kkò a ì sulu dökettã kekraè, kè wöklör se' a. E' tò s'sulu'weke wès kapöli sulusi tò s'ttèwã es. ⁹S'kkò wa se' tò Skèköl dör S'yé e' kìkekeka e' è wa se' alibchòke s'malepa yò'itò wès ie' wák es e'pa kì. ¹⁰Se' er buaè chòke, se' alibchòke s'kkò e' è wa. A yamipa, kè se' kàne e' wamblök es. ¹¹¿Wé a' wã isuule tò di' tum etkè a yèri tskirke ena di' sèse tskirke? ¹²A' wã ijcher buaè tò higo klò kè wörtã' olivoie ö uva kicha kè wörtã' higoie. A yamipa, es ñies di' sèse ena yèri kè tskirku' di' tum etkè a.

Skèköl siwé mokì, e' tò se' ké senuk yèsyèsè

¹³A' wèlepa e' bikeitsò tò a' wã siwa' meke Skèköl tò e' jcher taiè iwã ane buaè a' éna, e' tã e' wã kkachó sene yèsyèsè e' wa. A' senu kè e' ttsötã'kã wès wépa wã siwa' yèsyèsè jcher esepa ser es. ¹⁴Erè a' ukyerkeia ñita, a' kköwërkeia ñita, ese tso'ia' a' er sulu'ukwã, e' tã kè a' e' ttsökã tò a' wã siwa' yèsyèsè jcher. A' e' ttsökã es, e' tã a' tso' kachök. ¹⁵Siwa' ese kè mène Skèköl tso' kã jaì a e' wã. E' dör siwa' tskirke kã i' kì s'ditsò er a ese. E' meke se' a bé tò. ¹⁶Mik se' ukyerke kköwërke ñi tã etã ee taiè se' ñi chiliuke, ee ì sulu kos wamblërke. ¹⁷E' skéie, wépa tò Skèköl siwa' datse kã jaì a e' iuteke, esepa serke yèsyèsè. Esepa serke bèrè ñita. Ie'pa er buaè ñi kì. Ie'pa tò s'malepa sueke er siarè wa taiè. Ie'pa tò ì buaè weke kekraè sulitane a ñikkèè er mokì wa. ¹⁸Wépa tò s'patteke er bua'ukne ñi kì, esepa dör wès iyi kuatkökwak es. Sene bèrè kuatkeke ie'pa tò tã e' wã dörattã sene yèsyèsèie.

Yi éna sene sulu dalër, ese dör Skèköl bolök

4 ¹¿Ì tò a' ké ñi tsiriuk ñippök ñita? E' dör tò a' éna ì sulu wamblak e' ttsè'woie buaè, ese tso' ñippök, ì buaè tso' a' er a, ese tã. ²Ilè

kkecheke a' tō taijē, erē e' wà kè dō a' ulà a, e' kuekī a' tso'tke s'ttökwa. Ilè tō a' ukyēweke, erē e' kè dō a' ulà a, e' kuekī a' ñi tsiriuke ñippōke ñita. Erē ì kiane a' kī, ese kè kiè a' tō Skèköl a, e' kuekī kè idō a' ulà a. ³Mik ilè kié a' tō Skèköl a, etā kè a' wā ikine er mokī wa. A' éna iwā we'ikakwa a' wákpa kī e' ttsē'woje buaë. E' kuekī kè a' ulà a idē. ⁴iA' kè tō Skèköl dalöie wēs trēr wakpa kè tō imaso dalöie es! ¿A' kè wā ijcher tō ì sulu tso' ká i' a, ese wa se' wöbatsö, e' tã se' mía Skèköl bolökíe? Iskà chekeneyö, yi tō ì sulu tso' ká i' a ese sini'kué, e' tã ese wák mía Skèköl bolökíe. ⁵Kè a' tō ibikeitsök tō é Skèköl yèkkuö tō ichè: “Skèköl tō se' wiköl me'at senuk se' er a, e' ulatska tkënettsa se' kī, e' tō se' sibirtseke taijē.” ⁶Erē ì sulu wamblak se' éna ese wöklö'uk Skèköl tō s'kímeke taijē. Es itso' kitule ie' yèkkuö kī wé ichèitö: “Wépa e' ttsökā taijē, esepa wöklö'weke Skèköl tō. Erē wépa e' wöéwa diöshet, esepa a ie' er buaë chò.”^d ⁷E' kuekī a' e' mú Skèköl ttè dalöiök. Bé kè iutar tã ie' tkörashkar a' yöki. ⁸A' e' batsó Skèköl mik tã ie' e' batsöra a' mik. iA pè' sulusipa, sene sulu olo'yó, a' er batse'ú! A' erbikökeia bötböt, e' olo'yó, e' skéie a' erbikó etkéme Skèköl è a. ⁹iA' erianú, a' kköchó taijē, a' iú siarè! iKè a' jañukia, e' skéie a' iú siarè! iKè a' ttsē'nukia buaë, e' skéie a' erianú! ¹⁰A' e' ówa bèrè Skèköl wōa tã ie' tō a' kikeraka.

Kè se' ñi chök suluë

¹¹A yamipa, kè a' ñi chök suluë. Yi tō iyami cheke suluë ö iwatekeitö, e' dör wēs Skèköl ttè dalöiëno cheke suluë ena iwateke es. Es ese tō idalösewéwa. A' tō iwé es, e' tã a' e' tkéka iwā shulök, kè dör iwā dalöiök. ¹²Skèköl eköl è tō ittè dalöiëno me'at se' a. Ie' è dör s'shulökwak. Ie' è a se' tsatkërmi. Ie' è a se' kichatërmi. Etã zyí tō a' a kawö mé s'malepa kichatök?

Kè se' e' ttsökka

¹³Ye' ttò tso'. A' wēlepa tō ichèmi i' es: “Bulebök sa' mi'ke ká kuā'kī, etā eē sa' serke duas ek tã sa' kaneblömi taijē, inuköl klö'weraë sa' tō taijē e' blu'woje.” ¹⁴A' tō ichèmi es, erē ì tkömi a' tã e' kè ijcher a' wā. A' dör wēs mochka es, bla'mi tã sö isué, erē bet tã kè iku'ia. ¹⁵A' kawōtä ichök i' es: “Skèköl kī ikiane, e' tã sa' sermiiā tã kanè wésele wèmi sa' tō.” ¹⁶Erē a' e' ttsökā taijē, e' kuekī a' kè tō icheta' es. A' ibikeitseke tō a' serke a' wákpa è mik. Se' e' ttsökā es, e' kos dör suluë. ¹⁷Ì dör buaë wē, ese jcher se' wā, erē kè se' wā ñone, e' tã e' dör suluë.

Inuköl blúpa pattè

5 ¹iA inuköl blúpa, ye' ttò tso! iSkèköl tō a' we'ikeraë, e' kèwö döketke a' kī! iE' kuekī a' iú, a' kköchó taijē! ²Ì bua'buā tso' a' wā

^d 4.6 Proverbios 3.34

taijē, ese sulunewatke, a' datsi' katétke powak tō. ³Ñies a' orochka, a' inukölchka qos, e' dōli tokatke weirketke. Dōli e' tō iwā kkacheke tō a' kkē'blō suluē. E' kuēkī aishkuō tā a' weirdaē bō' kē a. Kā i' erkewatke, erē a' tso'iā ūyī blōk taijē a' wākpa a. ⁴A' tō ittśō. Wēpa kaneblōke a' a' a' iyiwō shtōk, e'pa kē patōne a' wa. E' tō ie'pa kkōchōweke taijē, e' ttsē Skēkōl dichē tā' taijē e' tō. ⁵Kā i' a' a' wā ūyī bua'buā tso' taijē e' ttsē'woie buaē. Ñermata a' dōr wes köchi kiéiesō ttēwa es; köchi kē éna iane tō ì sulu datse iki. ⁶Pē' ser yēsyesē kē a e' tsatker a' yōkī, esepa kkaté a' tō wōmēttsā ttēwa.

Se' weirke dalē'ttsōsō bèrē er bua' wa

⁷A yamipa, a' weirke qos, e' dalē'ttsō er bua' wa bèrē dō mik Skēkēpa Jesucristo datskene etā. ūyī kuatkōkwakpa saū wes ie'pa tō iwōrke e' wā paneke bèrē er bua' wa es. Ñies ie'pa tō kalī paneke bèrē er bua' wa as iyiwō tskir, talar buaē, wōne taijē. ⁸Skēkēpa datskene e' kēwō dōketke tsinet, e' kuēkī e' wā panū bèrē. A' e' tkōwā darērēē ie' a.

⁹A yamipa, kē a' ñi chōk suluē as a' kē we'ikō Skēkōl tō. Jesucristo dōr s'shulōkwak, e' dōketke tsinet wes yi dōkewatke ukkō a es. ¹⁰A yamipa, Skēkōl ttekōlpa bak kā iaiaē, e'pa weine taijē, e' dalē'ttsē'rakitō bèrē er bua' wa. E' saū, etā iwā ū es. ¹¹Se' tō ichē: “Wēpa weine siarē, e' dalē'ttsē'rakitō bèrē er bua' wa, ayēcha buaē esepa.” A' wā ittseüle tō kā iaiaē wēm bak ekōl kiē Job, e' weine taijē, erē ie' tō idalē'ttsē' bèrē er bua' wa. Ñies a' wā ijcher tō mik iweine siarē e' tka, etā Skēkōl er buaē yē' ie' a taijē. Skēkōl er dōr buaē, se' wēr siarē ie' wa, e' kuēkī ier buaē yē' Job a taijē.

¹²A yamipa, ttē chekeyō i' e' dōr ibua'ie: Mik a' tō ì cheke, etā kē ichar: “Ì chéyō e' dōr mokī Skēkōl tō kā jaì ena kā i' yō' e' wōwa” ò yile skà wōwa. A' ttō etkē. Mik a' icheke, “tō”, etā es idir; mik a' icheke, “au”, etā es idir. A' ichō es as kē a' kichatēr.

Ikiōsō Skēkōl a' ñi kī

¹³A' wēle weirke eriarke siarē, e' tā ese ttō Skēkōl tā. A' wēle ttsē'rke buaē, e' tā ese tō Skēkōl kīkōkā ittse wa. ¹⁴A' wēle duōke, e' tā ese tō Skēkēpa Jesús icha erule e'pa wōkirpa tsuk patkō, as e'pa bitū ikiōk Skēkōl a' iki ena kiō tōk iki Skēkēpa ttō wa. ¹⁵Ie'pa tō ikiē Skēkōl a' erblē imik mokī e' wa, e' tā ibuardane tā Skēkēpa tō ikerakane. Ñies ì sulu nuī tso' iki, e' tā e' olo'yeraeitō iki. ¹⁶E' kuēkī a' e' kkatōkā ñi a' tā ikiō Skēkōl a' ñi kī as a' buarne. Mik s'ser yēsyesē, esepa tō ì kiē Skēkōl a' er mokī wa, etā ie' tō iwā iūterāē buaē taijē. ¹⁷Skēkōl ttekōl bak kā iaiaē kiē Elías, e' dōr s'ditsō wes sulitane es. Erē ie' tō iki' Skēkōl a' er mokī wa tō as kalī kē yēr, etā kalī kē yēne dō duas mañal kī shabōts. ¹⁸E' ukuōkī tā ie' tō ikiēne Skēkōl a' tō as kalī yērne, etā mokī kalī yēnene tā ūyī kuá qos talane buaē.

Ì sulu wamblökwakpa k̄imusö ilo'yök

¹⁹A yamipa, a' wele tö ttè mok̄i, e' olo'yé, erè a' wele skà tö ik̄imé as idöne iit̄ökne, e' t̄a e' dör buaë. ²⁰A' éna ianú tö wépa tö pè' sulusi k̄imé ì wambléitö e' olo'yök, esepa tö ie' tsatkée ikichatër yöki, ñies inuì taië e' k̄os olo'yane iki.